

Ўзбекистон Республикаси Адлия
вазирлиги томонидан 20 _____ йил

« 6 » май да қайта
рўйхатга олинди.

Рўйхатдаги № 5117



Ўзбекистон Республикаси мудофаасига
кўмаклашувчи «Ватанпарвар»
ташкilotининг 2021 йил 26 мартда
бўлиб ўтган навбатдан ташқари
Конференциясида қабул қилинган.

ЎЗБЕКИСТОН РЕСПУБЛИКАСИ
МУДОФААСИГА КЎМАКЛАШУВЧИ
«ВАТАНПАРВАР» ТАШКИЛОТИ
УСТАВИ

Тошкент ш. – 2021 йил

"Vatanparvar" tashkiloti Markaziy kengashi	
Kirish №	
2021 yil	24.05.

I. УМУМИЙ ҚОИДАЛАР

1. Ўзбекистон Республикаси мудофаасига кўмаклашувчи “Ватанпарвар” ташкилоти (кейинги ўринларда – Ташкилот деб номланади) ихтиёрий уюшган фуқароларнинг оммавий-мудофаа, спорт-техник ва ҳарбий-ватанпарварлик фаолияти бўйича умумий манфаатларини кондиритиш ва Ташкилотнинг Уставида белгиланган мақсадларга эришиш учун тузилган жамоат бирлашмаси ташкилий-ҳуқуқий шаклидаги нодавлат нотижорат ташкилоти ҳисобланади.

Ташкилотнинг ўзбек тилидаги тўлиқ номи лотин алифбосида:

“O‘zbekiston Respublikasi mudofaasiga ko‘maklashuvchi “Vatanparvar” tashkiloti”.

Ташкилотнинг ўзбек тилидаги тўлиқ номи кирилл алифбосида:

“Ўзбекистон Республикаси мудофаасига кўмаклашувчи “Ватанпарвар” ташкилоти”.

Ташкилотнинг ўзбек тилидаги қисқартирилган номи лотин алифбосида:

“Vatanparvar” tashkiloti.

Ташкилотнинг ўзбек тилидаги қисқартирилган номи кирилл алифбосида:

“Ватанпарвар” ташкилоти”.

Ташкилотнинг рус тилидаги тўлиқ номи:

Организация содействия обороне Республики Узбекистан «Ватанпарвар».

Ташкилотнинг рус тилидаги қисқартирилган номи:

Организация «Ватанпарвар».

2. Ташкилот нодавлат нотижорат ташкилоти ҳисобланади, фойда олишни ўзининг асосий мақсади қилиб қўймайди ва олинган фойдани аъзолари ўртасида тақсимламайди.

3. Ташкилот Ўзбекистон Республикаси Конституцияси, Ўзбекистон Республикасининг Фуқаролик кодекси, “Нодавлат нотижорат ташкилотлари тўғрисида”ги, “Ўзбекистон Республикасида жамоат бирлашмалари тўғрисида”ги, “Ёшларга оид давлат сиёсати тўғрисида”ги, “Жисмоний тарбия ва спорт тўғрисида”ги, “Ижтимоий шериклик тўғрисида”ги, “Умумий ҳарбий мажбурият ва ҳарбий хизмат тўғрисида”ги қонунлари, Ўзбекистон Республикаси Президентининг тегишли Фармонлари ва Қарорлари, Ўзбекистон Республикаси Вазирлар Маҳкамасининг тегишли қарорлари ҳамда нодавлат нотижорат ташкилотлари фаолиятини тартибга солувчи бошқа норматив-ҳуқуқий ҳужжатлар ва ушбу Устав асосида фаолият кўрсатади.

4. Ташкилот фаолияти ихтиёрийлик, аъзоларининг тенг ҳуқуқлилиги, ошқоралик, ўзини ўзи бошқариш ва қонунийлик тамойилларига асосланади.

5. Ташкилот давлат рўйхатидан ўтказилган вақтдан бошлаб юридик шахс ҳисобланади, ўз мулкчилик ҳуқуқида алоҳида мол-мулкка эгалик қилади ва ўз номидан активлар олиши, мулкӣ ва шахсий номулкӣ ҳуқуқларни амалга ошириши, мажбуриятлар олиши, судда даъвогар ва жавобгар бўлиши мумкин.

Ташкилот мустақил балансга, тегишли банкларда ҳисоб рақамларига, шу жумладан, валюта ҳисоб рақамига, ўз номи ёзилган думалок муҳрга, штамплар ва бланкларга эга бўлади.

6. Ташкилот ўрнатилган тартибда рўйхатдан ўтказилган байроқ, эмблема, вимпел ва бошқа рамзларга эга бўлиши мумкин.

7. Ташкилот ушбу Устава назарда тутилган фаолиятни Ўзбекистон Республикасининг бутун ҳудудида амалга оширади.



8. Ташкилот ўз мажбуриятлари юзасидан ўзига тегишли барча мол-мулк билан жавоб беради. Ташкилот аъзолари Ташкилотнинг мажбуриятлари бўйича жавоб бермайди, Ташкилот эса ўз аъзоларининг мажбуриятлари юзасидан жавоб бермайди.

9. Ташкилотнинг доимий фаолият юритувчи раҳбар органи жойлашган жойи (почта манзили): 100017, Тошкент шаҳри, Осиё кўчаси, 86-А уй.

II. ТАШКИЛОТНИНГ МАҚСАД ВА ВАЗИФАЛАРИ

10. Ташкилотининг асосий мақсади Ўзбекистон Республикаси Қуролли Кучларининг мудофаа қобилиятини мустаҳкамлашга кўмаклашиш, фуқаролар, айниқса ёшларни меҳнатга ва Ватанни ҳимоя қилишга тайёрлаш, тегишли давлат ва жамоат ташкилотларига ёшларни баркамол шахс бўлиб вояга етказиш, ҳарбий-ватанпарварлик руҳида тарбиялаш, уларни касбга ўқитиш ҳамда спортга бўлган қизиқишини қўллаб-қувватлаш ишларида кўмаклашишдан иборат.

11. Ташкилот ўз фаолиятида қуйидаги принципларга амал қилади:

ўзининг Устав фаолиятини давлат ва жамоат ташкилотлари билан ҳамкорликда олиб бориш;

барча ташкилотлар ишида коллегияликни жорий қилиш, қарорларни кўпчилик фикрига таянган ҳолда қабул қилиш;

барча сайланадиган раҳбарлар ишида уларни сайлаган раҳбар органлар ва юқори раҳбар органлар олдида тўлиқ ошкораликни ҳамда ҳисоб беришни таъминлаш;

Ташкилот ҳар бир аъзосининг шахсий фикрини инобатга олиш, аъзоларнинг кадр-қиммати, шунингдек, кўпчилик ва озчиликнинг ҳуқуқларини ҳурмат қилиш, зарур бўлганда эркин мунозаралар олиб бориш учун шарт-шароитлар яратиш;

юқори раҳбар органлар қарорларининг бажарилиши қуйи органлар учун мажбурийлиги.

12. Ташкилот фаолиятининг асосий йўналишлари қуйидагилардан иборат:

фуқаролар, шу жумладан ёшларни маънавий-ахлоқий жиҳатдан етук қилиб ва ҳарбий-ватанпарварлик руҳида тарбиялаш, уларнинг онгига Ватанга муҳаббат, ватанпарварлик, меҳнатга масъулиятли муносабат, ҳарбий хизматга ҳурмат туйғуларини сингдириш;

спортнинг техник ва амалий турларини ривожлантирилиши ва оммалаштирилишини таъминлаш, спорт ташкилотлари ва жамоалари фаолиятига кўмаклашиш;

болалар, ўсмирлар ва чақирувгача бўлган ёшлар ўртасида оммавий спорт ишларини ташкил этиш ва ўтказиш;

ёшлар ва фуқароларни мудофаа соҳасидаги бошланғич билимларга ўқитишда ва уларни ҳарбий хизматга тайёрлашда давлат ҳокимияти органларига кўмаклашиш;

автомототранспорт воситалари ҳайдовчиларини, шунингдек, оммавий техник касблар мутахассисларини тайёрлаш, қайта тайёрлаш ва уларнинг малакасини ошириш;

шу каби йўналишлар бўйича фаолият юритаётган халқаро ташкилотлар билан фаол ҳамкорлик қилиш.

13. Ташкилот ўз фаолиятининг асосий йўналишларига мувофиқ қуйидаги вазифаларни амалга оширади:



фуқаролар, айниқса ёшларни ватанпарварлик руҳида тарбиялаш, уларда Ватанга муҳаббат, мамлакат суверенитети ва мустақиллигини ҳимоя қилиш бўйича юксак бурч туйғуларини шакллантириш ишларини олиб боради;

ёшларга оид давлат сиёсати соҳасида давлат ва жамоат ташкилотлари билан ҳамкорликда юксак ахлоқий фазилатларга эга, эътиқоди кучли, маънавий иммунитетини мустаҳкам, меҳнатсевар ёшларни тарбиялаш бўйича маънавий-маърифий ва ҳарбий-ватанпарварлик тадбирларини ташкил этади;

ёшларнинг менталитетимизга қарши турли хил ёт ғоялар ва оқимлар таъсирига тушиб қолишини олдини олишга қаратилган профилактик тарбиявий ишлар олиб боришда иштирок этади;

давлат бошқарув органлари билан ижтимоий шериклик соҳасида ҳамкорлик муносабатларини ўрнатишга қаратилган чора-тадбирларни амалга оширади;

давлат ва жамоат ташкилотлари билан ҳамкорликда ёшларни ижтимоий қўллаб-қувватлашга кўмаклашади, жумладан, уларни касб-хунар эгаллашлари ҳамда спорт билан шуғулланишлари учун зарур шарт-шароитлар яратишда иштирок этади;

давлат ва жамоат ташкилотлари билан ҳамкорликда ўсмирлар ва ёшлар ўртасида республика ҳарбий-спорт мусобақаларини ташкил этади ва ўтказди;

мамлакатнинг халқаро спорт майдонларда муносиб иштирокини таъминлаш мақсадида спортнинг техник ва амалий турлари бўйича терма жамоалар аъзоларини тайёрлаб боради ҳамда спортчиларнинг халқаро спорт мусобақаларида иштирок этишини таъминлайди;

спортнинг техник ва амалий турлари ўқув-машқ ва моддий-техник базаларини замон талаблари асосида ривожлантириш бўйича ишларни амалга оширади;

фуқаролар, айниқса, ёшлар ўртасида спортнинг техник ва амалий турларини оммалаштириш бўйича самарали тарғибот-ташвиқот ишларини олиб боради;

манфаатдор спорт федерациялари билан ҳамкорликда спортнинг техник ва амалий турларини ривожлантириш, мусобақалар ва турнирлар сифатини ошириш, спорт жамоаларини қўллаб-қувватлаш ишларини амалга оширади;

спортнинг техник ва амалий турлари бўйича халқаро спорт федерациялари ва иттифоклари билан ўзаро ҳамкорликни йўлга қўяди;

фуқаролар, айниқса ёшларнинг қизиқишларидан келиб чиқиб, ўз тизимида спортнинг техник ва амалий турлари бўйича тўғараклар ва секциялар ташкил этади;

ёшларни оммавий спортга кенг жалб қилиш мақсадида туман, шаҳар, вилоят, ва республика миқёсда спорт мусобақалари, кўргазмалар ва танловлар ўтказди;


фуқаролар, айниқса ёшлар ўртасида соғлом турмуш тарзини шакллантириш бўйича манзилли чора-тадбирларни амалга оширади;

чақирувга қадар ёшларни ҳарбий хизматга тайёрлашда давлат ҳокимияти органлари ва умумтаълим муассасаларининг ҳарбий-ватанпарварлик тадбирларини ўтказиш, спорт секциялари ва тўғараклари фаолиятини йўлга қўйиш, ўз тасарруфидаги ўқув-моддий базадан фойдаланиш ишларига кўмаклашади;

қонунчиликда ўрнатилган тартибда оммавий техник касблар мутахассисларини, жумладан автомобилотранспорт воситалари ҳайдовчиларини тайёрлаш, қайта тайёрлаш ва малакасини ошириш тизимини ташкил этади;

фуқароларни, айниқса ёшларни меҳнат бозорида талаб юқори бўлган техник касбларга ўқитиш бўйича ўқув курслари ва марказларини ташкил этади;

Ташкилот тизимидаги муассасаларнинг ўқув моддий-техник базасини мунтазам такомиллаштириб боради;



Ташкилотнинг халқаро майдонда ижобий обрўсини шакллантиради, ушбу соҳада фаолият юритаётган халқаро ташкилотлар ва хорижий спорт ташкилотлари билан икки томонлама ҳамкорлик алоқаларини ўрнатади;

қонунчиликда ўрнатилган тартибда Ташкилот мақсад ва вазифаларини амалга ошириш йўлида тadbиркорлик тузилмаларини ташкил этади, қайта ташкил этади ва уларнинг фаолиятини тўхтатади;

Ташкилот тизимида кадрлар сиёсатини амалга оширади, ходимларнинг малакасини ошириш ва қайта тайёрлашни ташкил этади;

Ташкилот аъзоларини меҳнатда жонбозлик ва ўрнатилган кўрсаткичлари учун рағбатлантиради, уларни давлат мукофотларига тавсия этади;

амалдаги қонун ҳужжатлари доирасида ҳомийлик фаолиятини олиб боради;

Ташкилотнинг фаолияти ҳақида электрон ва босма оммавий ахборот воситалари орқали аҳолига мунтазам, тўлиқ ва тезкор равишда ахборот тақдим этиб бориш ишларини амалга оширади.

III. ТАШКИЛОТНИНГ ТУЗИЛМАСИ ВА РАҲБАР ОРГАНЛАРИ

14. Ташкилотнинг тузилмаси ўз ичига Ўзбекистон Республикаси муҳофафасига кўмаклашувчи “Ватанпарвар” ташкилоти, унинг Қарақалпоғистон Республикаси бўлинимаси, Тошкент шаҳар ва вилоятлар бўлинималарини (кейинги ўринларда - ҳудудий кенгашлар деб аталади) олади.

15. Конференция, Марказий кенгаши йиғилиши ва Марказий кенгаш Ҳайъати - Ташкилотнинг раҳбар органлари ҳисобланади.

16. Ташкилотнинг олий раҳбар органи Конференция ҳисобланади. Ташкилот Конференцияси беш йилда камида бир марта чақирилади. Зарур ҳолларда Ташкилотнинг навбатдан ташқари Конференцияси чақирилиши мумкин.

17. Ташкилотнинг Конференцияси ваколатига қуйидагилар киради:

Ташкилот Уставини қабул қилади, унга қўшимча ва ўзгартиришлар киритади;

Ташкилот Марказий кенгаши ҳамда назорат-тафтиш комиссияси аъзолари сонини белгилайди, уларнинг таркибларини 5 йил муддатга сайлайди;

Ташкилот Марказий кенгаши ва назорат-тафтиш комиссиясининг ҳисоботини тинглайди, уларни ишига баҳо беради, фаолиятининг асосий йўналишларини белгилайди, улар бўйича қарорлар қабул қилади, бошқа масалаларни кўриб чиқади;

Ташкилот фаолиятини тўхтатиш, қайта ташкил этиш ва тугатиш тўғрисида қарор қабул қилади.

Ташкилот Конференциясининг қарорлари кўпчилик овоз билан қабул қилинади.

18. Ташкилот Конференциясини чақириш ва унинг кун тартиби, Конференцияга вакиллик меъёри ва делегатлар сайлаш тартиби Ташкилот Марказий кенгаши Ҳайъати қарори билан белгиланади ва Конференция ўтказишдан бир ой олдин Конференция чақирувчи раҳбар орган томонидан эълон қилинади.

19. Ташкилот Конференциясига сайланган делегатларнинг ваколати 5 йил муддатдан иборат.

20. Ташкилот Марказий кенгаши Конференциялар оралиғида Ташкилот фаолиятига раҳбарлик қилади ва қуйидагилар унинг ваколатига киради:

Ташкилот Марказий кенгаши раисини, унинг биринчи ўринбосари ва ўринбосарларини 5 йил муддатга сайлаш, уларни муддатидан олдин эгаллаб турган лавозимларидан озод қилиш юзасидан қарорлар қабул қилиш;

Ташкилот Конференцияси қарорлари ижросини ташкил этиш;



Ташкилотнинг ҳисобот давридаги фаолияти бўйича Марказий кенгаш раисининг ҳисоботини тинглаш ва у бўйича қарорлар қабул қилиш;

Ташкилот фаолиятини такомиллаштириш бўйича мақсадли, манзилли дастур ва режаларни тасдиқлаш ҳамда уларнинг ижросини назорат қилиш;

Марказий кенгаш Ҳайъати аъзоларини 5 йил муддатга сайлаш ва унинг таркибига ўзгартиришлар киритиш;

зарур ҳолларда Конференциялар оралиғида давлат, нодавлат ва жамоат ташкилотлари вакилларини Марказий кенгаш таркибига киритиш ҳамда Марказий кенгаш раисини, унинг биринчи ўринбосари ва ўринбосарларини сайлаш ва лавозимидан озод қилиш билан боғлиқ ташкилий масалаларни кўриб чиқиш;

Ташкилотни спортнинг техник ва амалий турлари бўйича Халқаро Федерациялар таркибига кириши тўғрисидаги масалаларни кўриб чиқиш;

Ташкилотнинг асосий фаолият йўналишлари бўйича қарорлар қабул қилиш.

21. Марказий кенгаш таркиби эгаллаб турган лавозимларига кўра Марказий кенгаш раиси, унинг биринчи ўринбосари, ўринбосарлари, Ташкилотнинг ҳудудий кенгашлари раислари, давлат, нодавлат ва жамоат ташкилотлари вакиллари ҳамда бошқа аъзолардан иборат бўлади.

22. Марказий кенгаш йиғилиши бир йилда камида бир марта Марказий кенгаш Ҳайъати қарорига асосан чақирилади. Зарур ҳолларда Марказий кенгашнинг навбатдан ташқари йиғилиши чақирилиши мумкин.

Марказий кенгаш йиғилишида қарорлар кўпчилик овоз билан қабул қилинади.

23. Марказий кенгаш йиғилишлари оралиғидаги даврда Ташкилот фаолиятига раҳбарлик узлуксиз амалга оширилишини таъминлаш, жорий ташкилий-ижро ишлари бўйича масалаларни тезкор ҳал этиш мақсадида Марказий кенгаш ўз таркибидан Марказий кенгаш Ҳайъатини сайлайди.

Марказий кенгаш Ҳайъати таркибининг сони ва унинг таркиби Марказий кенгаш йиғилишида белгиланади.

24. Марказий кенгаш Ҳайъатига Марказий кенгаш раиси раҳбарлик қилади ва таркибига лавозимлари бўйича Марказий кенгаш раисининг биринчи ўринбосари, ўринбосарлари ва Марказий кенгашнинг сайланган бошқа аъзолари кирадилар.

25. Марказий кенгаш Ҳайъати ўз ваколатлари доирасида қуйидаги вазифаларни ҳал этади:

Ташкилот Конференцияси ва Марказий кенгаш йиғилишлари қарорларининг бажарилишини ташкил этади:

Ташкилотнинг Конференциясини чақириш тўғрисида қарор қабул қилади, Конференцияга вакиллик меъёрлари ва делегатлар сайлаш тартиби ҳамда Конференциянинг кун тартибини белгилайди;

Ташкилот фаолиятининг долзарб масалалари бўйича Марказий кенгаш йиғилишини чақириш тўғрисида қарор қабул қилади, Марказий кенгаш йиғилишининг кун тартибини белгилайди;

Ташкилотнинг йиллик асосий тадбирлар режасини, Марказий кенгаш аппаратининг молиявий режасини, спортнинг техник ва амалий турлари бўйича спорт мусобақалари таквимий режаси ҳамда тегишли давлат ва жамоат ташкилотлари билан ҳамкорлик қилиш режаларини кўриб чиқади, тасдиқлайди ва улар ижросини ташкил этади;



Ташкилот фаолиятининг асосий йўналишлари бўйича ўтказиладиган энг муҳим, аҳамиятли тадбирларни республика электрон ва босма оммавий ахборот воситаларида ёритиш юзасидан қарорлар қабул қилади;

Ташкилот Марказий Кенгаши аппарати ва унинг бўйсунувидаги таркибий бўлинмалар ҳамда ҳудудий кенгашлар аппаратларининг бошқарув тузилмаси ва штат жадвалларини тасдиқлайди ва уларга ўзгартиришлар киритади;

Марказий кенгаш ёки Марказий кенгаш Хайъатининг қарори билан ташкил этилган ташкилотлар ва муассасаларнинг ташкилий-штат тузилмасини тасдиқлаш ҳамда унга ўзгартиришлар киритиш масалалари бўйича қарорлар қабул қилади;

Ташкилот Марказий кенгаши тасарруфидаги муассасалар ва ташкилотларни ташкил этиш, қайта ташкил этиш ёки тугатиш юзасидан қарор қабул қилади, уларнинг таъсис ҳужжатларини тасдиқлайди;

Ташкилот тизимидаги ҳудудий кенгашлар, ўқув муассасалари ва ташкилотлари ҳамда бошқа тадбиркорлик тузилмаларининг фаолиятини мувофиқлаштириб боради;

Халқаро ташкилотлар, шунингдек, халқаро спорт ташкилотлари билан ҳамкорлик қилиш тўғрисида қарор қабул қилади;

Ташкилот ва унинг бўлинмалари молиявий маблағлари ва мол-мулкидан унинг Уставида белгиланган мақсадларга эришиш ва вазифаларни бажариш йўлида оқилона ва самарали тасарруф қилиш масалалари бўйича қарорлар қабул қилади;

Ташкилотнинг мол-мулкани (фойдаланиш, сотиш, сотиб олиш, бўлиш, ижарага бериш ва бошқа ҳаракатлар) ва молиявий маблағларини тасарруф этиш тартиби ва қоидаларини белгилайди;

ёшларни ҳарбий-ватанпарварлик руҳида тарбиялашга оид тадбирларни давлат, нодавлат ва жамоат ташкилотлари билан ҳамкорликда ташкил этиш ва амалга ошириш юзасидан қарорлар қабул қилади;

спортнинг техник ва амалий турларини ривожлантириш ва оммалаштириш масалалари юзасидан қарорлар қабул қилади;

спорт турларининг давлат реестрига киритилган спортнинг техник ва амалий турлари юзасидан қарорлар қабул қилади ва уларни ривожлантиришга раҳбарлик қилади;

Ташкилот тизимида кадрлар малакасини ошириш ва уларни қайта тайёрлашни ташкил қилишга доир масалаларни кўриб чиқади ва қарорлар қабул қилади;

Ташкилот тизимида замонавий ахборот технологияларини жорий этади ҳамда мазкур масалалар юзасидан тегишли қарорлар қабул қилади.


Ташкилот тизимида ўтказиладиган танловлар натижаларини кўриб чиқади, улар ғолибларини мукофотлаш ва шарафлаш тартиби тўғрисида қарорлар қабул қилади;

Ташкилот тизимида ишлаётган фаол ва виждонан меҳнат қилаётган ходимлар орасидан давлат мукофотлари билан тақдирлашга тақдим қилиш учун номзодларни кўриб чиқади ва тасдиқлайди;

Устав фаолияти доирасида турли ташкилотлар ва хусусий шахсларга ҳомийлик ёрдами кўрсатиш тўғрисида қарорлар қабул қилади;

амалдаги қонунчиликка мувофиқ автомобилотransпорт воситалари ҳайдовчиларини ва оммавий касбларнинг бошқа турлари мутахассисларини тайёрлаш, қайта тайёрлаш ва малакасини ошириш ҳамда аҳолига бошқа публик хизматлар кўрсатишни ташкил этиш масалалари юзасидан қарорлар қабул қилади;

амалдаги қонунчиликка мувофиқ Ташкилотнинг Устав фаолияти йўналишлари бўйича меъёрий-ҳукукий ҳужжатларни ишлаб чиқади ва тасдиқлайди;



заруратга кўра жисмоний ва юридик шахсларнинг Марказий кенгаш Ҳайъати фаолиятига тааллуқли мурожаатларини кўриб чиқади ва улар бўйича қарорлар қабул қилади;

Марказий кенгаш Ҳайъати йиғилишларида кўриладиган ва муҳокама қилинаётган масалалар бўйича қарорлар лойиҳаларини тайёрлайди, қабул қилинган қарорлар ижросини ташкил этади;

худудий кенгашларни ташкил этиш, қайта ташкил этиш ва тугатиш юзасидан қарор қабул қилади, Низомини тасдиқлайди, унга ўзгартиш ва қўшимчалар киритиш бўйича қарорлар қабул қилади;

қонунчиликда ўрнатилган тартибда худудий кенгашлар тақдимномаларига кўра бўйсунувидаги ўқув муассасалари ва ташкилотлари, тадбиркорлик тузилмалари ва бошқа ташкилотларни ташкил этиш, қайта ташкил этиш ёки тугатиш тўғрисида қарорлар қабул қилади;

худудий кенгашларнинг ахборот ҳамда ҳисоботларини тинглайди, уларнинг фаолиятини такомиллаштириш бўйича қарорлар қабул қилади;

худудий кенгашларнинг молия-хўжалик фаолиятини таҳлил қилади ва улар бўйича қарорлар қабул қилади, улар томонидан белгиланган молиявий ҳисобот тақдим қилинишини ташкил этади;

худудий кенгаш раиси ва унинг ўринбосарлари лавозимига номзодларни кўриб чиқади, улар бўйича қарор қабул қилади ҳамда тавсия этилган номзодни лавозимга сайлаш масаласини кўриб чиқиш учун тақдим этади;

зарурат туғилганда худудий кенгаш раисини ва унинг ўринбосарларини муддатидан олдин лавозимидан озод этиш ҳамда худудий кенгаш таркибидан чиқариш тўғрисида худудий кенгашга кўрсатма беради;

худудий кенгашларнинг Ташкилот Уставига ва меъёрий-ҳуқуқий ҳужжатларга зид қарорлари ижросини тўхтатиш ёки уларни қисман ёки тўлиқ бекор қилиш бўйича қарорлар қабул қилади;

Ташкилот фаолиятининг бошқа масалалари бўйича амалдаги қонунчиликка зид бўлмаган қарорлар қабул қилади.

26. Ташкилот Конференцияси, Марказий кенгаш ва Марказий кенгаш Ҳайъати ваколатларига тааллуқли бўлмаган бошқа масалалар Ташкилот Марказий кенгаши раисининг ваколатларига қиради ва белгиланган тартибда ҳал этилади.

27. Марказий кенгаш раиси:

Ташкилот Уставида белгиланган вазифалар, Ташкилот Конференцияси, Марказий кенгаш Йиғилиши ва Марказий кенгаш Ҳайъати қарорлари ижросини ташкил этади;

худудий кенгашларнинг фаолиятини мувофиқлаштиради ва Ташкилот фаолиятига умумий раҳбарликни амалга оширади;

давлат органлари, нодавлат ва жамоат ташкилотларида, юридик ва жисмоний шахслар олдида Ташкилот номидан вакиллик қилади;

Ташкилот Конференцияси, Марказий кенгаши ва Марказий кенгаш Ҳайъати йиғилишларини тайёрлаш ва уларни ўтказишни, қабул қилинган қарорлар ижросини ташкил этади;

Ташкилотни ривожлантиришнинг мақсадли дастурлари, асосий тадбирларининг йиллик ва ойлик режаларини ишлаб чиқиш ва бажаришни ташкил этади;



Ташкилот фаолиятига тегишли турли ташкилий масалаларни кўриб чиқади ҳамда Марказий кенгаш ва Марказий кенгаш Ҳайъати йиғилишларига таклифлар киритади;

Ташкилотнинг фаолиятида тегишли қонун ҳужжатлари ва норматив-ҳуқуқий ҳужжатлар талаблари қатъиян бажарилишини назорат қилади;

Ташкилот тизимида давлат дастурлари ҳамда давлат, нодавлат ва жамоат ташкилотлари билан ҳамкорликда амалга ошириладиган режалар бажарилишини ташкил этади;

Ўрнатилган муддатларда рўйхатга олувчи орган ва бошқа ваколатли давлат органларига Ташкилот фаолиятига доир ахборотлар тақдим этилишини ташкил қилади;

Ташкилот фаолиятига доир меъёрий ҳужжатлар ва низомлар ишлаб чиқишни ташкил этади;

Ташкилот номидан мамлакатдаги ва хориждаги давлат, нодавлат ва жамоат ташкилотлари билан ҳамкорликни ташкил этади;

тасдиқланган молиявий режа ва раҳбар орган қарорига мувофиқ Ташкилот мол-мулки ва пул маблағларини тасарруф қилиш бўйича битимларга имзо чекади;

банкларда Ташкилотнинг миллий ва хорижий валютадаги ҳисоб-рақамларини очишни ташкил этади;

Марказий кенгаш аппаратини шакллантиради, Марказий кенгаш аппаратиға ходимларни танлайди ва тайинлайди ҳамда уларнинг лавозим мажбуриятларини тасдиқлайди;

Марказий кенгаш аппарати ходимлари, Марказий кенгашга бўйсунадиган ташкилот ва муассасалар раҳбарлари билан меҳнат шартномалари тузади ва бекор қилади;

ҳудудий кенгашлар раислари сайланганда Марказий кенгаш раиси буйруғи билан лавозимга тайинлайди ва улар билан ҳудудий кенгашни навбатдаги конференцияси ўтказиладиган муддатгача меҳнат шартномалари тузади ва лавозимидан бўшатиладиганда улар билан меҳнат шартномаларини бекор қилади;

ҳудудий кенгаш раиси муддатидан олдин лавозимидан озод этилганда, Марказий кенгаш Ҳайъати қарорига асосан, ҳудудий кенгашнинг янги раиси сайлангунга қадар унинг вазифасини вақтинча бажарувчини буйруқ билан тайинлайди;

зарур ҳолларда Марказий кенгаш йиғилишлари оралиғида Марказий кенгаш Ҳайъати қарорига асосан, Марказий кенгаш раисининг биринчи ўринбосари ва ўринбосарлари лавозимларига номзодлар танлашни амалга оширади ва уларнинг вазифаларини вақтинча бажарувчиларни тайинлайди;

ҳудудий кенгашларнинг молия-ҳўжалик фаолиятининг мунтазам таҳлилин амалга ошириш ва улар томонидан белгиланган ҳисобот тақдим этилишини ташкил қилади;

юрidik ва жисмоний шахслар билан амалдаги қонунчиликка мувофиқ шартномалар тузади;

Ташкилот ходимлари ва спортчиларининг хорижий давлатларга хизмат сафарларини ўрнатилган тартибда ташкил этади;

Ташкилотда фуқароларни қабул қилишни ҳамда жисмоний ва юридик шахслардан тушган мурожаатларни қонунда белгиланган тартибда кўриб чиқишни ташкил этади;



Ташкилот ходимларининг шахсий масалаларини ҳамда улар томонидан меҳнат қонунчилигини бузиш ва бошқа интизомга ҳилоф ноҳўя ҳаракат содир қилиниши ҳолатларини кўриб чиқади.

28. Марказий кенгаш раиси Ташкилот фаолиятига тегишли масалалар бўйича буйруқлар, фармойиш ва кўрсатмалар чиқаради.

29. Марказий кенгаш раиси зиммасидаги вазифаларни бажара олмайдиган ҳолларда унинг вазифасини Ташкилот Марказий кенгаши Ҳайъати қарорига биноан Марказий кенгаш раисининг биринчи ўринбосари ёки ўринбосарларидан бири вақтинча бажариб туради.

IV. ХУДУДИЙ КЕНГАШЛАР

30. Худудий кенгашлар Ўзбекистон Республикаси мудофаасига кўмаклашувчи "Ватанпарвар" Ташкилотнинг таркибий бўлинмалари ҳисобланади ва бевосита Ташкилот Марказий кенгашига бўйсунди.

Худудий кенгашларни ташкил этиш, қайта ташкил этиш ва тугатиш Марказий кенгаш Ҳайъати қарори асосида амалга оширилади.

Худудий кенгашлар ўз фаолиятини ушбу Устав, худудий кенгашлар тўғрисида Низом ва Ташкилотнинг ички меъёрий ҳужжатларига мувофиқ амалга оширадилар.

Худудий кенгашлар тўғрисидаги Низом Марказий кенгаш Ҳайъати томонидан тасдиқланади.

Худудий кенгаш Конференцияси, худудий кенгаш йиғилиши ва худудий кенгаш Ҳайъати, худудий кенгашларнинг раҳбар органлари бўлиб ҳисобланади.

31. Худудий кенгашларнинг навбатдаги Конференцияси беш йилда камида бир марта чақирилади. Зарур ҳолларда худудий кенгашларнинг навбатдан ташқари Конференциялари чақирилиши мумкин.

Конференцияни чақириш, делегатлар сони, унинг кун тартиби ҳақидаги қарор Худудий кенгаш томонидан Марказий кенгаш Ҳайъатининг қарори асосида қабул қилинади.

32. Худудий кенгаш Конференцияси:

унинг раиси ва назорат-тафтиш комиссиясининг ҳисоботини тинглайди, уларнинг ишларига баҳо беради;

худудий кенгашнинг навбатдаги вазифаларини белгилайди;

худудий кенгаш таркибини ҳамда назорат-тафтиш комиссиясини 5 йил муддатга сайлайди;

Марказий кенгаш Конференциясига делегатларни сайлайди.

33. Худудий кенгаш Конференциялар оралиғида худудий бўлинма фаолиятига раҳбарлик қилади ва унинг ваколатига қуйидагилар қиради:

Ташкилот ва худудий кенгаш Конференциялари қарорлари ижросини ташкил қилиш;

худудий кенгаш раиси ва унинг ўринбосарларини 5 йил муддатга сайлаш;

худудий кенгаш Ҳайъати аъзоларини 5 йил муддатга сайлаш, таркиби сонини белгилаш ва унинг таркибига ўзгартиришлар киритиш;

зарур ҳолларда Марказий кенгаш Ҳайъати билан келишилган ҳолда айрим худудий кенгаш аъзоларини ўз таркибидан чиқариш, ўрнига янги аъзолар киритиш, худудий кенгаш раиси ва ўринбосарларини сайлаш ҳамда уларни муддатидан олдин лавозимидан озод қилишга доир ташкилий масалалар юзасидан қарор қабул қилиш;



худудий кенгаш раисининг ҳисобот даври бўйича ҳисоботини тинглаш ва у бўйича қарорлар қабул қилиш;

худудий кенгашнинг фаолиятини такомиллаштириш бўйича режаларни тасдиқлаш ҳамда уларнинг бажарилиши устидан назоратни амалга ошириш;
фаолиятнинг асосий йўналишлари бўйича қарорлар қабул қилиш.

34. Худудий кенгаш таркиби эгаллаб турган лавозимларига кўра худудий кенгаш раиси, раис ўринбосарлари, таркибий тузилмалар вакиллари, давлат, нодавлат ва жамоат ташкилотларининг вакиллари ҳамда бошқа аъзолардан иборат бўлади. Худудий кенгаш таркибининг сони худудий кенгаш Конференцияси томонидан белгиланади.

35. Худудий кенгашнинг йиғилиши бир йилда камида икки марта чақирилади. Зарур ҳолларда худудий кенгашнинг навбатдан ташқари йиғилиши чақирилиши мумкин. Худудий кенгаш йиғилиши қарорлари кўпчилик овоз билан қабул қилинади.

36. Худудий кенгаш йиғилишлари оралиғидаги даврда раҳбарлик қилиш ҳамда жорий ташкилий-ижро ишлари бўйича масалаларни тезкор ҳал этиш мақсадида худудий кенгашлар ўз таркибидан худудий кенгаш раиси, унинг ўринбосарлари ва бошқа аъзолардан иборат таркибда худудий кенгаш Ҳайъатини сайлайди.

37. Худудий кенгаш Ҳайъати ўз ваколатлари доирасида қуйидаги вазифаларни бажаради:

Конференциялар, Марказий кенгаш Ҳайъати ва худудий кенгаш қарорларининг ижросини ташкил этади;

Марказий кенгаш Ҳайъати қарори асосида худудий кенгаш Конференциясини чақириш тўғрисида қарор қабул қилади, зарур ҳужжатларни тайёрлайди;

худудий кенгаш йиғилишини чақириш тўғрисида қарор қабул қилади, зарур ҳужжатларни тайёрлайди, унинг муҳокамасига масалалар киритади, қабул қилинган қарорлар ижросининг назоратини ташкил этади;

Ташкилот раҳбарияти билан келишув асосида худудий кенгашнинг асосий тадбирлар, молиявий режаларини, спортнинг техник ва амалий турлари бўйича спорт тадбирларининг тақвимий режасини ҳамда худудий тегишли давлат, нодавлат ва жамоат ташкилотлари билан ҳамкорлик қилиш режаларини кўриб чиқади, тасдиқлайди ва уларнинг ижросини ташкил этади;

таркибий тузилмаларнинг режаларини кўриб чиқади ва тасдиқлайди, уларнинг бажарилишини назорат қилади;

таркибий тузилмаларнинг ахборотлари ва ҳисоботларини тинглайди, уларнинг фаолиятини мувофиқлаштириш ва такомиллаштириш бўйича қарорлар қабул қилади;

давлат, нодавлат ва жамоат ташкилотлари билан ҳамкорликда амалга ошириладиган худудий давлат дастурлари ва режаларининг бажарилишини ташкил этади;

Ташкилот Марказий кенгаши Ҳайъати билан келишув асосида қонунчиликда ўрнатилган тартибда ўз тасарруфида муассасалар, ташкилотлар ва тадбиркорлик тузилмаларини ташкил этиш, қайта ташкил этиш, тугатиш тўғрисида қарорлар қабул қилади, уларнинг таъсис ҳужжатларини тасдиқлайди;

ёшларни ҳарбий-ватанпарварлик руҳида тарбиялашга оид ишларни давлат, нодавлат ва жамоат ташкилотлари билан ҳамкорликда ташкил этиш ва амалга ошириш юзасидан қарорлар қабул қилади;



худудий кенгаш номенклатурасига тааллуқли кадрларни танлаш ва жой-жойига қўйишни амалга оширади;

ўз худудида спортнинг техник ва амалий турларида ривожлантириш ва оммалаштириш фаолиятини ташкил этади;

спорт турларининг давлат реестрига киритилган спортнинг техник ва амалий турларини ривожлантириш ва мувофиқлаштириш, уларга раҳбарлик қилишни амалга ошириш бўйича қарорлар қабул қилади;

автомобилтранспорт воситалари ҳайдовчиларини, оммавий техник касблар мутахассисларини тайёрлаш, қайта тайёрлаш ва малакасини ошириш ҳамда аҳолига бошқа пуллик хизматлар кўрсатиш масалалари юзасидан қарор қабул қилади;

бўйсунувидаги муассасалар ва ташкилотларнинг молия-хўжалик фаолиятини, тасдиқланган молиявий режаларини бажаришни ташкил этади ва назорат қилади;

бўйсунувидаги муассасалар ва ташкилотларнинг смета ҳаражатлари, ташкилий-штат тузилмасини тасдиқлайди ва уларга зарур ўзгартиришлар киритади;

бўйсунувидаги муассасалар ва ташкилотларнинг инфратузилмасини, ўқув моддий-техник ва спорт базасини яратиш ва такомиллаштириш бўйича ишларни амалга оширади;

бошланғич ташкилотларни ташкил этиш, қайта ташкил этиш ва тугатиш юзасидан қарор қабул қилади;

бошланғич ташкилотлар ҳисобини юритиш ва фаолиятини мувофиқлаштириш бўйича тегишли қарорлар қабул қилади;

бошланғич ташкилотлар аъзоларининг ҳисобини юритиш ҳамда аъзолик бадалларини йиғиш ва уларни Уставда белгиланган вазифаларни бажаришга мақсадли сарфлашга доир масалаларни кўриб чиқади ва тегишли қарорлар қабул қилади;

бошланғич ташкилотларнинг намунавий Низомини тасдиқлайди, унга ўзгартиш ва қўшимчалар киритиш бўйича қарорлар қабул қилади;

худудий кенгаш Конференцияси ва йиғилишларида кўриладиган масалалар бўйича қарорлар лойиҳалари тайёрланишини амалга оширади;

амалдаги қонун ҳужжатлари доирасида ҳомийлик фаолиятини амалга оширади;

ўз ваколатлари доирасида худудий кенгаш фаолиятига доир қонун ҳужжатларига ва Ташкилот Уставига зид бўлмаган бошқа масалаларни кўриб чиқади.

38. Худудий кенгаш йиғилиши ва худудий кенгаш Ҳайъати ваколатига кирмайдиган бошқа масалалар худудий кенгаш раисининг ваколатларига киради ва қонунларда белгиланган тартибда ҳал этилади.

39. Худудий кенгаш раиси:

Ташкилот Уставада ва юқори раҳбар органлари қарорларида белгиланган вазифалар ижросини ташкил этади;

худудий кенгаш Конференцияси, худудий кенгаш ва унинг Ҳайъати йиғилишларини тайёрлашни, уларни ўтказиш ва қабул қилинган қарорлар ижросини ташкил этади;

худуддаги барча давлат органлари ва жамоат ташкилотларида худудий кенгаш номидан вакиллик қилади;

худудий кенгаш фаолиятига умумий раҳбарликни амалга оширади;



худудий кенгашнинг йиллик ва ойлик асосий тадбирлар режасини ишлаб чиқиш ва бажаришни ҳамда худудий кенгаш доирасида Ташкилотни ривожлантириш дастурлари бажарилишини ташкил этади;

худудий кенгаш фаолиятига доир ташкилий масалаларни кўриб чиқади ва худудий кенгаш ва унинг Ҳайъати йиғилишларига таклифлар киритади;

худудий кенгаш фаолиятида қонун ҳужжатлари ва меъёрий-ҳуқуқий ҳужжатлар талаблари бажарилишини назорат қилади;

ўрнатилган муддатларда Марказий кенгашга, рўйхатдан ўтказувчи орган ва бошқа ваколатли давлат идораларига худудий кенгаш фаолияти тўғрисида ахборотлар ва ҳисоботлар тақдим этилишини ташкил қилади;

худудий кенгаш номидан давлат, нодавлат ва жамоат ташкилотлари билан ҳамкорликни ташкил этади;

тасдиқланган сметалар ва раҳбар органлар ҳужжатларига мувофиқ худудий кенгашнинг пул маблағлари ва мол-мулкини тасарруф қилиш бўйича ҳужжатларга имзо чекади;

худудий кенгаш аппаратида ходимларни танлашни амалга оширади, уларни лавозим мажбуриятларини тасдиқлайди, худудий кенгаш аппарати ходимлари ҳамда бўйсунувдаги муассасалар ва ташкилотлар раҳбарлари билан меҳнат шартномалари тузади ва бекор қилади;

амалдаги қонунларга мувофиқ ўз ваколатлари доирасида юридик ва жисмоний шахслар билан шартномалар тузади;

худудий кенгашда фуқароларни қабул қилиш ҳамда юридик ва жисмоний шахсларнинг мурожаатлари билан ишлашни ташкил этади;

худудий кенгаш аппарати ходимларининг шахсий масалаларини ҳамда улар томонидан меҳнат қонунчилигини бузиш ва бошқа интизомга ҳилоф ноҳўя ҳаракат содир қилиниши ҳолатларини кўриб чиқади;

худудий кенгаш фаолиятига доир масалалар бўйича буйруқлар, фармойишлар ва кўрсатмалар чиқаради.

40. Худудий кенгаш раиси ўз зиммасига юклатилган вазифаларни бажариш учун худудий кенгаш аппаратини шакллантиради.

V. БОШЛАНҒИЧ ТАШКИЛОТЛАР

41. Бошланғич ташкилотлар фуқаролар, ёшларнинг иш, ўқиш ва яшаш жойларида, Ташкилот мақсад ва вазифаларига хайрихоҳ бўлган камида беш нафар жисмоний шахсларнинг ташаббуси билан худудий кенгашлар билан келишув асосида тузилиши мумкин.

42. Бошланғич ташкилотлар худудий кенгашлар Ҳайъати қарорига асосан ташкил этилади, қайта ташкил этилади ва тугатилади.

Бошланғич ташкилотлар юридик шахс мақомига эга бўлмайди, жамоатчилик асосида фаолият юритадилар.

Бошланғич ташкилотлар ҳисоби худудий кенгашлар томонидан юритилади. Бошланғич ташкилотлар ва Ташкилот аъзолари сони худудий кенгашларнинг иш фаолиятини баҳолашда асосий кўрсаткичлардан бири ҳисобланади.

43. Бошланғич ташкилотлар фаолиятини ташкил этиш, уларнинг ҳуқуқ ва мажбуриятлари Ташкилот Марказий кенгаш Ҳайъати қарори билан тасдиқланган бошланғич ташкилотнинг намунавий Низоми асосида худудий кенгашлар Ҳайъати қарори билан тасдиқланган Низомида белгиланади.



44. Бошланғич ташкилотлар фаолияти ҳудудий кенгашлар ҳамда унинг тасарруфидаги муассаса ва ташкилот раҳбариятлари томонидан мувофиқлаштирилиб борилади. Бошланғич ташкилотлар томонидан Ташкилот Уставида белгиланган мақсад ва вазифаларнинг ваколати доирасида амалга оширилишига, шунингдек, уларнинг фаолият олиб боришлари учун зарурий шароитлар яратишга муассаса ва ташкилот раҳбариятлари шахсан масъулдирлар.

45. Бошланғич ташкилотнинг йиғилиши ҳамда бошланғич ташкилот кенгаши бошланғич ташкилотнинг раҳбар органлари ҳисобланади.

46. Бошланғич ташкилотнинг юқори раҳбар органи мазкур ташкилот аъзоларининг йиғилиши ҳисобланади.

Бошланғич ташкилот йиғилиши эҳтиёж бўлган пайтда, аммо бир йилда камида бир маротаба бошланғич ташкилот кенгаши раисининг қарори билан ёки бошланғич ташкилот аъзоларининг ярмидан кўпининг талаби ҳамда ҳудудий кенгаш талаби билан ўтказилади.

Бошланғич ташкилот йиғилишларида қарорлар кўпчилик овоз билан қабул қилинади.

47. Бошланғич ташкилотнинг йиғилиши бошланғич ташкилот фаолиятига оид бўлган масалаларни кўриб чиқади. Унинг бевосита ваколати қуйидагилардан иборат:

бошланғич ташкилот фаолиятига доир иш режаларини кўриб чиқиш, тасдиқлашга киритиш, уларнинг ижросини таъминлаш;

бошланғич ташкилот кенгаши раисини ҳамда кенгаш аъзолари таркибини бир йил муддатга сайлаш ва уларнинг ваколатларини муддатидан илгари тўхтатиш;

бошланғич ташкилот кенгаши раисининг ҳисоботини тасдиқлаш; фуқароларни Ташкилот аъзолигига қабул қилиш, уларнинг ҳисобини юритиш, аъзоликдан чиқариш бўйича қарор қабул қилиш юзасидан ҳудудий кенгашларга таклифлар киритиш;

белгиланган вакиллик меъёрларига асосан ҳудудий кенгаш Конференцияларига делегатларни сайлаш;

ташкилот аъзолари, аҳоли ва ёшларни жалб қилган ҳолда маънавий, ҳарбий-ватанпарварлик ва спорт йўналишидаги турли оммавий тадбирлар, танловлар ва мусобақалар ўтказишни ташкил қилиш;


ташкилот аъзоларининг ҳуқуқ ва манфатларини ҳимоя қилиш, муваффақиятга эришган аъзоларни моддий ва маънавий рағбатлантиришга доир масалаларни кўриб чиқиш ҳамда ҳудудий кенгашларга таклифлар киритиш.

48. Бошланғич ташкилот ва унинг фаолияти билан боғлиқ бўлган масалалар бошланғич ташкилот Низомида белгиланади.

49. Бошланғич ташкилотни тарқатиб юбориш ҳақидаги қарор мазкур ташкилотнинг йиғилиши томонидан қабул қилинади. Агар унинг фаолияти аслида тўхтаб қолган ёки ушбу Уставга зид бўлган ҳолда, уни тарқатиб юбориш тўғрисидаги қарор ҳудудий кенгаш Хайъати томонидан қабул қилинади.

VI. ТАШКИЛОТ АЪЗОЛАРИ, УЛАРНИНГ ҲУҚУҚ ВА МАЖБУРИЯТЛАРИ

50. Ўзбекистон Республикасининг 18 ёшга етган, Ўзбекистон Республикаси мудофаасига кўмаклашувчи "Ватанпарвар" ташкилоти Уставини тан олувчи ва



аъзолик бадалларини ўз вақтида тўлаб турувчи фуқаролари Ташкилотга ихтиёрий равишда аъзо бўлишлари мумкин.

Ташкилот аъзолигига қабул қилиш фуқароларнинг ёзма аризасига биноан амалга оширилади.

51. Ташкилотга аъзоликка қабул қилиш ва аъзоликдан чиқариш, аъзолар ҳисобини олиб бориш ҳамда аъзолик гувоҳномаларини бериш тартиби Ташкилот Марказий кенгаш Ҳайъати қарори билан тасдиқланган Йўриқнома асосида белгиланади.

52. Кириш ва аъзолик бадаллари миқдорини белгилаш Марказий кенгаш Ҳайъати қарори асосида амалга оширилади.

53. Ташкилот аъзоларининг ҳуқуқлари:

Ташкилотнинг сайланадиган раҳбар органлари ва назорат-тафтиш органларига сайлаш ва сайланиш;

Ташкилот раҳбар органлари Конференциялари ва йиғилишларида, бошланғич ташкилот йиғилишларида масалаларни муҳокама қилишда ўз фикрини эркин ифода этиш;

Ташкилотнинг сайланадиган органлари қарорларини ишлаб чиқишда шахсан иштирок этиш;

Ташкилот фаолияти тўғрисида ўзларига тааллуқли бўлган маълумотларни олиш, масалаларни муҳокама қилишда иштирок этиш ва фикр билдириш;

Ташкилот фаолиятида Устав доирасида иштирок этиш, ҳар қандай раҳбар органига ариза ва таклифлар билан мурожаат этиш.

Ташкилотнинг барча аъзолари тенг ҳуқуқларга эга.

54. Ташкилот аъзоларининг мажбуриятлари:

Ташкилотнинг Устав талабларини бажариш, мақсад ва вазифаларини амалга оширишда қатнашиш;

жамиятда ва ёшлар ўртасида Ташкилотнинг обрўси ва нуфузини ошириб бориш;

Ташкилот раҳбар органлари Конференция ва йиғилишлари, шунингдек бошланғич ташкилотларнинг йиғилишлари қарорларини бажариш;

маънавий ва ахлоқий етук, жисмоний баркамол бўлиш, ватанпарвар фуқаро шайнига доғ туширадиган ҳаракатларга йўл қўймаслик;

Ташкилотнинг барча фаолият йўналишларида фаол иштирок этиш ва ташаббус кўрсатиш.

55. Аъзолик бадалларини тўлаш, қабул қилиш, ҳисобини юритиш, сарфлаш ва назорат қилиш тартиби ҳамда кириш ва аъзолик бадаллари тушумини тақсимлаш бўйича ажратмалар меъёри Ташкилот Марказий кенгаш Ҳайъати қарори билан тасдиқланган Йўриқнома асосида амалга оширилади.

Кириш ва аъзолик бадаллари Ташкилот Уставида белгиланган мақсадларга эришиш ва вазифаларни бажаришга ўрнатилган тартибда йўналтирилади.

VII. ТАШКИЛОТДА САЙЛОВЛАР ТИЗИМИ

56. Марказий ва ҳудудий кенгашлар раислари, уларнинг ўринбосарлари ва бошланғич ташкилотлар раислари лавозимлари сайланадиган лавозимларга қиради. Сайланувчи лавозимни эгалловчи шахслар Марказий ва ҳудудий кенгашлар раисларининг ўринбосарлари ва бошланғич ташкилотлар раислари ўзларининг фаолиятларини жамоатчилик асосида, ихтиёрийлик ва бегараз асосда штатлар жадвалига киритилмаган ҳолда бажаришлари мумкин.



57. Ташкилотнинг сайланадиган лавозимларига раҳбар ва бошқа ходимларни тайинлаш ёки лавозимларидан озод қилиш ўрнатилган тартибда Ўзбекистон Республикасининг меҳнат тўғрисидаги қонун ҳужжатларига мувофиқ амалга оширилади.

58. Сайловлар демократик асосда ўтказилади. Йиғилиш ёки Конференция қарорига кўра овоз бериш ҳар бир номзод бўйича алоҳида ёки номзодларнинг умумий рўйхати бўйича ўтказилиши мумкин. Йиғилиш ёки Конференция иштирокчиларининг ярмидан кўпи номзодни ёқлаб овоз берган тақдирда, у сайланган ҳисобланади.

59. Ташкилот ва унинг тизимидаги раҳбар орган йиғилишида овоз бериш ҳуқуқига эга иштирокчиларининг ярмидан кўпи қарорни ёқлаб овоз берса, қарор қабул қилинган ҳисобланади.

60. Ташкилот тизимида штатдаги лавозимларни эгаллаб турган Ташкилот аъзолари сайланадиган лавозимларга сайланиш ва уларнинг вазифаларини жамоатчилик асосида бажариш ҳуқуқига эга.

61. Ташкилот ва унинг тизимидаги раҳбар органи йиғилиши унда раҳбар орган аъзоларининг камида учдан икки қисми иштирок этганда қарор қабул қилишга ваколатли ҳисобланади.

VIII. НАЗОРАТ-ТАФТИШ КОМИССИЯЛАРИ

62. Ташкилотнинг Устав доирасидаги фаолиятини назорат қилиш учун Ташкилот Конференцияси ва ҳудудий кенгашлар Конференциялари қарорлари билан 3-7 кишидан иборат таркибда назорат-тафтиш комиссиялари тузилади.

63. Назорат-тафтиш комиссиялари тегишли ҳудудий кенгашлар ҳамда уларга бевосита бўйсунувчи ташкилот ва муассасаларнинг молия-хўжалик фаолияти тафтишини Ташкилот тизимида назорат-тафтиш ишини ўтказиш амалиётида қабул қилинган қоида ва йўриқномаларда кўзда тутилган тартибда ва ҳажмда ўтказади.

64. Назорат-тафтиш комиссияси қуйидаги вазифаларни бажаради:

Ташкилотнинг юқори раҳбар органлари ва унинг қуйи ташкилотларида қонун ҳужжатлари ва Ташкилот Устави талабларига риоя этилиши ҳамда Ташкилот раҳбар органлари томонидан қабул қилинган қарорларнинг ижроси назоратини амалга оширади;


Ташкилот ва унинг тузилмаларининг молиявий-хўжалик фаолиятини, маблағларнинг Устав талабларига мос равишда ва мақсадли сарфланишини белгиланган ҳисобот даври учун тафтишдан ўтказади ҳамда уларнинг натижалари бўйича тегишли маълумотномалар тайёрлайди;

Ташкилотнинг молиявий, тадбиркорлик ва бошқа фаолият йўналишларида қонун бузилишларининг олдини олиш бўйича назоратни амалга оширади;

жисмоний ва юридик шахслар мурожаатлари ҳамда фуқароларни қабул қилиш ишларининг ташкил қилиниши, уларни кўриб чиқиш муддатлари, улар бўйича қабул қилинган қарорларнинг тўғрилиги бўйича ишлар аҳволини текширади;

Ташкилот аъзоларининг мурожаатларини кўриб чиқади ва уларнинг натижаси бўйича Ташкилотнинг тегишли раҳбар органларига таклифлар киритади;

Ташкилот аъзолари томонидан аъзолик бадалларининг тўланишини, уларнинг қирим қилинишини ва ҳисоби юритилишини ҳамда ушбу жараён Устав ва ички норматив ҳужжатлар талаблари асосида ташкил этилишини текширади.



65. Назорат-тафтиш комиссиялари тафтиш (текширув) натижалари бўйича далолатнома ва таклифларни Ташкилотнинг юқори раҳбар органларига киритади ҳамда ўз фаолияти юзасидан тегишли Конференция олдида ҳисобот беради.

Тафтиш (текширув) яқунлари бўйича бир ой муддатда тегишли қарор қабул қилиниши шарт.

IX. ТАШКИЛОТНИНГ МОЛ-МУЛКИ ВА ПУЛ МАБЛАҒЛАРИНИ ШАКЛЛАНТИРИШ МАНБАЛАРИ

66. Ташкилот ўз аъзоларининг манфаатларини ҳисобга олган ҳолда ушбу Уставда белгиланган вазифаларни амалга ошириш учун ўз тасарруфида бинолар, иншоотлар, спорт-соғломлаштириш масканлари, тураржой, жиҳозлар, асбоб-ускуналар, автомобилотранспорт воситалари, миллий ва хорижий валютада пул маблағлари, қимматли қоғозларга ва ўз маблағлари ҳисобига ҳосил қилинадиган, ушбу Уставда назарда тутилган фаолиятни моддий таъминлаш учун зарур бошқа мол-мулкка эга бўлиши мумкин.

67. Ташкилотнинг мол-мулки ягона ва бўлинмасдир. Ташкилот мол-мулкини (эғалик қилиш, фойдаланиш, сотиш, сотиб олиш, бўлиш, ижарага бериш ва бошқа ҳаракатлар) ва молиявий маблағларини тасарруф этиш тартиби Марказий кенгаш Ҳайъати қарори билан белгиланади ва у томонидан амалга оширилади.

68. Ташкилотнинг мол-мулкини шакллантириш манбалари қуйидагилар ҳисобланади:

Ташкилот аъзоларининг кириш ва аъзолик бадаллари;

турли фаолият турларидан тушган даромад (фойда);

Ташкилот фаолиятининг асосий йўналишлари бўйича дастур ва лойиҳаларни амалга оширишга йўналтирилган давлат органлари, жамоат бирлашмалари, шу жумладан, халқаро спорт ташкилотларидан грантлар, субсидиялар ва давлат буюртмаси кўринишида келиб тушадиган мақсадли маблағлар;

жисмоний ва юридик шахсларнинг ихтиёрий мулкӣ бадаллари ва хайриялари;

конун ҳужжатларида тақиқланмаган бошқа тушумлар.

69. Ташкилот номидан Ташкилот мол-мулкига эғалик қилиш ҳуқуқини Марказий кенгаш Ҳайъати амалга оширади.

70. Ҳудудий кенгашлар ва улар бўйсунувидаги ташкилотлар ва муассасалар Ташкилот мулкини Марказий кенгаш Ҳайъатининг тегишли қарорисиз мустақил равишда бошқа шахсларга бериш ҳуқуқига эга эмаслар.

71. Ташкилотнинг фаолиятдан олинadиган даромад (фойда) Ташкилот аъзолари ўртасида тақсимланмайди, Уставда назарда тутилган вазифаларни бажариш учун йўналтирилади.

72. Ташкилот турли давлат, жамоат ва нодавлат ташкилотлар томонидан тақдим этилган мол-мулкка эга бўлиши мумкин. Ушбу мол-мулкдан фойдаланиш, уни тасарруф этиш ва қайтариш тартиби мол-мулк эгалари билан тузилган шартномаларда келишилган тартибда амалга оширилади.

X. ТАШКИЛОТНИНГ ҲУҚУҚ ВА МАЖБУРИЯТЛАРИ

73. Ташкилот қуйидаги ҳуқуқларга эга:

ўз аъзоларининг ҳуқуқлари ва конуний манфаатларини ифодалаш ҳамда ҳимоя қилиш;



ижтимоий ҳаётнинг турли масалаларига доир ташаббуслар билан чиқиш, давлат ҳокимияти ва бошқарув органларига таклифлар киритиш;
давлат ҳокимияти ва бошқарув органларининг қарорларини ишлаб чиқишда қонун ҳужжатларида назарда тутилган тартибда иштирок этиш;
ўз фаолияти тўғрисида ахборот тарқатиш;
оммавий ахборот воситаларини таъсис этиш ва ўрнатилган тартибда ноширлик фаолиятини амалга ошириш;

Уставда белгиланган вазифаларни бажариш учун тadbиркорлик тузилмаларини ташкил этиш;

ўз рамзий белгиларини таъсис этиш;
ўз фаолиятига тааллуқли масалалар юзасидан йиғилишлар, мажлислар, конференциялар ўтказиш;

қонун ҳужжатларига мувофиқ ваколатхоналар очиш ва филиаллар ташкил этиш;
Ташкилот қонун ҳужжатларида назарда тутилган бошқа ҳуқуқларга ҳам эга.

74. Ташкилотнинг мажбуриятлари қуйидагилардан иборат:

қонун ҳужжатларига риоя этиш;
нодавлат нотижорат ташкилотини рўйхатдан ўтказувчи органга ўзи ўтказаетган тadbирларга эркин кириш имконини бериш;
рўйхатдан ўтказувчи, солиқ ва статистика органларига ўз фаолияти тўғрисида ҳисоботлар тақдим этиш;

Ташкилот қонун ҳужжатларида назарда тутилган бошқа мажбуриятларга ҳам эга.

XI. ТАШКИЛОТНИНГ ҚУРОЛЛИ КУЧЛАР БИЛАН ҲАМКОРЛИГИ

75. Ташкилот мамлакат ёшларини ҳарбий-ватанпарварлик руҳида тарбиялашда, уларда халқимиз тарихига ва маънавий кадриятларига юксак ҳурмат туйғусини шакллантиришда, Ватан ҳимоясига, унинг миллий хавфсизлиги, ҳудудий яхлитлиги ва суверенитетини таъминлашга доимо шай туриш ҳамда ҳарбий хизматни ўташга тайёрлаш мақсадида Ўзбекистон Республикаси Қуролли Кучлари билан ўрнатилган тартибда ҳамкорлик қилади ва уларга ҳар томонлама кўмаклашади.

76. Ташкилот фуқаро ва ёшларни мудофаа соҳасидаги бошланғич билимларга ўқитишда ва уларни ҳарбий хизматга тайёрлашда давлат бошқаруви органларига кўмаклашади.

77. Ташкилотнинг чақирилувчи ёшларни ҳарбий хизматга тайёрлаш тизимида амалга ошириладиган асосий вазифалари қуйидагилардан иборат:

ҳарбий-ватанпарварлик руҳидаги тарбиявий ишларнинг олиб борилиши, шунингдек тadbирларнинг ташкил этилиши ва ўтказилиши умумтаълим муассасалари билан ҳамкорликда амалга ошириш;

ҳарбий-ватанпарварлик тарбиясига оид кўргазмали воситалар ишлаб чиқилишида иштирок этиш;

умумтаълим муассасалари мурожаатларига асосан, ўқувчи ёшларнинг қизиқишига кўра спортнинг техник ва амалий турлари бўйича секциялар ва тўғарақлар фаолиятини йўлга қўйишда амалий ёрдам кўрсатиш;

зарурат бўлганда, умумтаълим муассасаларига чакирувга қадар тайёргарлик бўйича ўз тасарруфидаги ўқув-моддий базадан фойдаланишларини таъминлаш.

78. Спортнинг техник ва амалий турлари ёшларни Ўзбекистон Республикаси Қуролли Кучларида хизмат қилишга тайёрлашнинг таркибий қисмидир.



79. Ташкилот ва Мудофаа вазирлиги ўртасидаги муносабатлар, жумладан Ташкилотга ҳарбий мутахассислар жалб этиш масалалари икки томонлама ёзма келишув асосида амалга оширилади.

80. Ташкилот тизимида ҳарбий хизматчиларнинг ҳарбий хизматни ўташнинг ўзига хос хусусиятлари Ўзбекистон Республикаси фуқароларининг ҳарбий хизматни ўташ тартиби тўғрисидаги Низомга асосан белгиланади.

ХII. ТАШКИЛОТ УСТАВИГА ЎЗГАРТИРИШЛАР ВА ҚЎШИМЧАЛАР КИРИТИШ ТАРТИБИ

81. Ташкилот Уставига ўзгартириш ва қўшимчалар киритилиши Ташкилот Конференцияси қарори асосида амалга оширилади.

82. Уставга ўзгартириш ва қўшимчалар киритилгандан сўнг Ташкилот ўрнатилган тартибда Ўзбекистон Республикаси Адлия вазирлигидан қайта рўйхатдан ўтказилиши лозим.

ХIII. ТАШКИЛОТНИ ҚАЙТА ТАШКИЛ ЭТИШ ВА ТУГАТИШ ТАРТИБИ

83. Ташкилот унинг Конференцияси қарори билан қайта ташкил этилиши мумкин.

84. Ташкилот фаолияти унинг Конференцияси қарори ёки суднинг қарори билан тугатилиши мумкин. Ташкилотни тугатиш чоғида белгиланган тартибда тугатиш комиссияси тузилади.

85. Ташкилот тугатилганда унинг юридик ва жисмоний шахслар билан ҳисоб-китобдан кейин қолган мол-мулк ва маблағларидан қонунларда ўрнатилган тартибда Ташкилот Уставидаги мақсад ва вазифаларга мувофиқ фойдаланилади.

Марказий кенгаши раиси Х.А.Батиров



Батиров Хусан Арзудинович